

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA IUNI 2022

email: sulusamoa@cccs.org.ws - Main Office: Ph. 24414, Ext 30 - website: www.cccs.org.ws

MALUMALU FOU EFKS SALEAULA



Susuga Penaia Koro FS & Faletua ia Lagi, i luma o le Malumalu Fou
SUI TA'ITA'IFONO FES AUE! UA MALILIU TOA!



**Susuga Asotasi Gu Time FT & Savaliga
Ta'ita'ifono Komiti Au Toeaina**



**TA'ITA'IFONO
KOMITI ATINA'E EFKS
Susuga Niulala Kupa FS**
(20 Me 1956 - 18 Iuni 2022)

FAASINO UPU

1. O LE LAUGA	2
2. TOFIGA FOU, TA'ITA'IFONO KAT	3
3. OLE LOTU MA LE KOVITI	3
4. MALUMALU EFKS SALEAULA	4
5. SAMOA JOURNAL OF THEOLOGY	5
6. IA FAATELEGES TEISI-1	5
7. TUSI FAITAU ASO IA IUNI	6
8. O LE PEROFETA MULIMULI	8
9. IA FAATELEGES TEISI-2	11
10. NA O AFIOGA E TULEI MAI	12
11. O E UA FAI I LAGI FOLAUGA	14
12. ATA O MATAUPU TUSIA	16

O LE LAUGA

Tusi Faitau: Mareko 6: 30 - 44

Matua: Mareko 6: 31, “*Ona fetalai atu lea o ia ia te i latou, “Ina o mai ia, tau lava o i tatou, i se mea tuufua, sei tou mapu a'e teisi.” Auā e toatele e na feoa'i ai, ua lē mafai ai i latou ona aai.*”

Manatu Autu:

O MALOLOGAE FAAFOUINAAI

O le faamoemoe lava ma le finagalo paia o lo tatou Atua, ia lē tu'uloloaina lo tatou ola, e faatino ni galuega ma feau, ua faatatauina ma lo tatou vala'auina. E tāua ai le malolo, le mapu ane, se'i toe saili malosi, ma sesema se taimi e toe fotua'i ai ni amataga fou o le ola auauna, ma le ola fa'aogaina mo Lona finagalo. E faapei foi ona saunia e le Atua le aso fitu e fai ma malologa, mai Lona galue foafoa ai i le amataga, a e fai foi mo le tagata soifua, ia toe sasa'a ai le fafao, ma toe matimati ai le malosi ma le ola e faaosofia pea, ia lē tineia le faamoemoe ua taoto a o se ala o'o.

O le molimau a Mareko ia Iesu ma Lona au so'o, o lea ua to'ai taunu ma ua toe feiloai ma lo latou Alii, mai le faamoemoe sa auina atu i latou e faamalolo ma folafola le Tala Lelei e uiga i le malo o le Atua, ua afio mai ma Iesu. O se tasi lava o vaega tāua ma le telē sa feagai ma le au soo. O le foi ane o le au soo a o tumutumu le motu o tagata e vagavagai le Alii Faaola, ma Lona i ai i auvai o le vaitafe.

O lona finagalo i lona au soo, se'i mapu ane teisi ua leva ona fa'a'augagase ma ua moomia ai se taimi e malolo, ma fai sina faasiliaga malosi. O le uiga foi o Lona finagalo, se vaipanoa mo Ia ma Lona au soo, se'i faailoa mai, pe faapē'i le galuega sa auina atu ma valaaauina ai i latou. O lea sa ia fetalai atu ai i upu ua fai ma matua, “*Ina o mai ia, tau lava o i tatou, i se mea tu'ufua, se'i tou mapu a'e teisi.*” O lona uiga sa tāua i le finagalo o le Alii Faaola, se vaipanoa mo Ia ma Lona au soo. O Lona finagalo foi lea mo se malologa mai se faamoemoe, e tutupu ai matagi lelei, e lagona ai le malosi fou, ma toe saga u'una'ia ai le fa'aauauina o le galuega ma Lona finagalo fa'aauauina. A o le avanoa lava foi e faailoa mai ai, pe sa manua le galuega, pe sa i ai foi ni faaletonu i le faatinoina o lo latou valaaauina. O le mea lava ua mautinoa le tulaga manua o le galuega sa auina i ai le au soo, auā sa tauto'alua e le mana o le Atua, ua afio mai ma Iesu. O le ata manino lava o le au soo sa lē faamaumauina le avanoa, sa lē lafoa'iina auupega sa foa'iina i ai e Iesu e faatino ai le galuega. A o lea ua atagia ai o le au soo sa usita'i ma faalogo, sa faamuamua lava Le e ana le galuega. O lona uiga o lo tatou usitai ma tausisia mea uma ua foa'iina ma fa'aalia mai e faatino ai lo tatou valaaauina, e lē pine le taunu manua o le galuega, ma le feau ua tuuina mai ia i latou.

E lua lava vaega taua o loo i le vaega o le mataupu filifilia. Muamua, ‘o le feagai ai o Iesu ma lona au soo ma le malologa’. Lona lua, ‘o le fafagaina o le motu o tagata, pe tusa ma le lima afe o tane, a e le'i faitauina ai tina ma tamaiti.’ O lona uiga pe a fua i le feagai ai o Iesu ma lona au soo ma lo latou mapu ane teisi, ua fai ma avanoa ua faatuputupula'ia ai le faitau aofai o e ua mulimuli ia Iesu. Ma ua latou lagonaina le taua o le a'oa'o atu o Iesu, ma lona faamalolo atu. O lona uiga o lo tatou saili matagi e ala i le mapu a'e teisi, e fai ma avanoa e toe faatutumuina ai i latou i meaalofa o le galuega, ma fa'aauupegaina ai pea lo tatou ola mo le Atua ma Lona finagalo. O lo tatou mapu a'e teisi, e galue mai ai le Atua, e toe tapena i latou, ma ia tatou toe saili atu ai foi i lo tatou Atua, le mea e ao ona tatou toe amata ai.

Le Eklesia e, e eseese lava auala ua fa'aaogaina e le Atua, e ala mai ai lo tatou avanoa, tatou te mapu ae teisi ai, ma fai ma malologa mo i tatou. Ia 'aua lava nei avea lo tatou naunau i le i'a, a e maumau ai le upega. O le mea lava ua uma ona a'oa'oina ai i tatou e ala i le faatuatua, ua uma ona saunia e lo tatou Matai le malologa sili mo tatou agaga. A o le mea e ao ona tatou manino ma le mautinoa, o i tatou foi ua uma ona faailoa mai e lo tatou Alii, le taua o le mapu a'e, malolo ifo, mai o tatou valaauiina eseese. O lo tatou ola tautua ma le fa'aaogaina e le Atua, e i ai taimi ua 'ela ai la tatou vaa'i ma lo tatou ola faatin, ua avea lo tatou mapu a'e, ma avanoa e faafouina ai le malosi, ma fai avanoa e saili manogi, ma toe matimati ai o tatou valaauiina. A o avanoa foi e toe tapenaina ai i tatou e lo tatou Atua, e ala i le galue mai o Lona Agaga, e faatutumuina ai o tatou tagata, ua faavaivaia e le matapoto o le tiapolo. O le maliu ma le toetu o Keriso, ua avea ma avanoa tatou te mapu ma malolo ai, o le faaolataga sili lea ua saunia e lo tatou Atua, e malolo ai o tatou tino, o le mafaufau, a o tatou agaga. Amene.

Saunia: Vaigafa Paleono FS.

EFKS Vaovai, Falealili.

Matagaluega FALEALILI SAFATA SIUMU

TOFIGA FOU, TAITAIFONO KOMITI AU TOEAINA

O le susuga Asotasi Gu Time FT, le Ta'ita'ifono o le Komiti Au Toeaina (ma KMTA, Komiti a Malua, Komiti A'oa'oga Kerisiano), ua filifilia e avea ma Sui Ta'ita'ifono o le Fono a Eklesia Soofaatasi i Samoa (FES/NCC). O lenei tofiga sa faia i le Fono Tele a le FES i le masina nei, ua sui tulaga ai nei le susuga ia Asotasi Time FT, ia Aisoli Iuli o le Eklesia Metotisi ua see atu i le nofoa o le Ta'ita'ifono, sa se'e'i ai le afioga i le Tiakono o Kasiano Leaupepe o le Eklesia Katoliko, ua faamavae ona o gasegase. O le faato'ā toe tofia lea o se isi sui o le EFKS i lea tofiga, talu mai le susuga Oka Fauolo FT sa avea ma Failautusi, Sui Taitaifono ma le Taitaifono o le FES i tausaga e tele a e le'i valaauiina e le Atua i le aso 12 Me 2012. Ua toe filifilia foi le susuga Maauga Motu FS, o le Faifeau Nofoaiga o le EFKS Vailele, e fa'aauau lona avea ma Failautusi o le Fono a Eklesia Soofaatasi a Samoa. Ia faamanua le Atua i lo la'ua valaauiina.

OLE LOTU MA LE KOVITI

O le igoa lea o le polokalame fou a le Ofisa Faamisionare, i totonu o le Matagaluega a le Failautusi Aoao, susuga Vavatau Taufao FS, a o vaaia e le Komiti Faamisionare. O se polokalame na faamaite lava e le susuga Failautusi Aoao ma susuga i Faifeau ma A'oa'o o le Ofisa, ma o se vaega o le misiona aoao tetele a le EFKS, ua tusa lelei foi ma lana anavatau o le 'Moe Manatunatu' e tauologologo le Tala Lelei, e o faatasi ai le soifua faaleagaga ma le ola lelei i itu uma. O le polokalame o loo fai paaga ai le Eklesia ma le Matagaluega o Soifua Maloloina, faapea le Matagaluega o Leoleo ma Falepuipui ma Tineimu. O le tatalaina aloaia o le 'Lotu ma le Koviti' sa faia i le Maota o le Galuega EFKS Lalomanu, i le afiafi o le Aso Sa 19 Iuni 2022, i se sauniga lotu puupuu sa ta'ita'i e le afioga i le Ta'ita'ifono Fono Tele, susuga Iosefa Atapana Uilelea FT. O le amataga foi lea o le faasologa o le polokalame i afiafi o Aso Sa, i le nofo a Matagaluega e sefulu i Samoa. O le mae'a ai o lea sauniga lotu, na faasolo ai loa le polokalame sa auai le aufaigaluega o Faafeagaiga Taulagi ma Faletua, faapea sui filifilia mai Autalavou ma Aulotu o le Matagaluega Lotofaga Lepa ma Aleipata.

O le faatinoga o lenei faamoemoe e aofia ai Pepa e saunia e susuga i A'oa'o galulue i le Ofisa Faamisionare - o se vaaiga faaleagaga e tusa o mau mai le Tusi Paia; o Pepa mai Ofisa o le Malo, i le itu tau le faama'i ma ona puipuiga, faapea le itu tau le tulafono o puipuiga ai le soifua o tagatanuu. O faatalatalanoaga, felafolafoaiga i fesili ma tali, ma fetufaaiga o finagalo ma manatu, e aoga tele lea i le faalauiola atili o le Faama'i, o ona puipuiga ma togafitiga, ma ona aafiaga i le soifuaga o tagata i le tino, mafaufau ma le agaga. Ua faatulaga le faagasologa o lenei polokalame i le nofo a Matagaluega e sefulu i Samoa. O le Aso Sa 26 Iuni sa tali malo ai le afioga i le Sui Taitaifono o le Fono Tele, susuga Tunumoso Soliola Iosia FT ma le Matagaluega Falealili Safata Siumu, sa faataunuina i le Maota o le Galuega EFKS Matautu. Ona faasolo atu lea i Matagaluega Vaimauga, Apia, Faleata, Malua, Aana, Faasaleleaga, Itu o Tane ma taualuga ai i le Matagaluega a Apia Sasa'e pe a tusa ma le finagalo o le Atua. O aafiaga o lenei faama'i, sa aafia tele ai tapuaiga i Aso Sa, o Aoga Aso Sa ma Autalavou, o Potopotoga ma Tofiga a Pulega ma Matagaluega, e oo lava i le Fono Tele. Malo lava!

FAAPA'IA MALUMALU EFKS SALE'AULA

O le Aso Tofi 9 Iuni 2022 na faapa'ia ai le malumalu fou o le EFKS Sale'aula, o galulue ai le susuga Penaia Koro FS ma le faletua ia Lagi. O le faletua o le Taitaifono Fono Tele, afioga Tekimatang I. Uilelea na ia ooti le lipine e tatala aloaia ai le galuega, tatala faitoto'a ma ulufale le mamalu o le Ekalesia, Aiga, le Aulotu i ona Matafale e 27 ma le au valaaulia mo le tapuaiga e faapa'ia ai le galuega. Na ta'ita'i le Toeaina o le Pulega Gaga'emauga, susuga Palemia Tauiliili Reupena FT, i le sauniga mamalu na auai le Laulau o le Fono Tele, le Laulau a le Komiti Au Toeaina ma le toatele o Toeaina ma Faletua, Faafeagaiga ma Faletua e le gata o le Pulega, le Matagaluega Itu o Tane, a o itu eseese o le Ekalesia. Sa auai foi le paia maualuga o le Malo, i le afioga i le Sui Palemia (sa to'esea le Tamaitai Palemia), le Fofoga Fetalai, Minisita o le Kapaneta ma sui Faipule o le Palemene o Samoa.

O le susuga i le faafeagaiga ia Penaia Koro FS na saunia le Tala o le Galuega, e otooto atu faapea:

(i) Talaaga o Malumalu Tuai: O le Fale Sa EFKS laulioa, ua avea nei ma mata'aga o le nu'u ona o le "lava" ma le mauga mu i le 1905 – 1911, lea e va'ava'alua ma le tu'ugamau o le taupou, o lo'o i ai le matega o le Malumalu lona lua lea a le EFKS i le fa'asologa mai o Fale Sa...

Sa i ai ma fale afolau ae fola i le ma'ama'a, fa'apea ma fale na gaosi i le "namu" *na fai* ma Malumalu Tapuai pe tolu, ina ua see mai i le aai nei le Galuega, ae maise o le fanua lenei e igoa o le "Ogele'i", o le foa'i a le Aiga Sā Leutulavā, ua tu ai le Galuega, ma saini lima ai le Aiga ma le Ekalesia i le 1952...

O le Malumalu lenei tatou te i ai, na fausiaina i le 1974 ae faaulufale i le 1975 e le Matai Tufuga o Taavao, i le taitaiga a le Faifeau Toeaina o Saio Aeau ma le Faletua o Lemāfo'e faapea le sao tāua ma le aogā o tua'ā ma aiga i lea vaitau, ma o le ono ai lea o Fale Sa o le EFKS i lenei nu'u... lea ua tatou fufui ma 'aleaga fa'atasi ai, mo lona Sauniga Lotu Mulimuli (na faia i le aso 8 Aokuso 2021).

E lē o maua ni faamaumauga o le Aufaigaluega a le Alii, mai le amataga o le faavaeina o le EFKS i Saleaula, vaganā le tausaga e 1930, na maea ai le galuega a le Susuga iā Tito, ua lē māua lona fa'ai'u ma le tausaga na amata galue ai...

O le tausaga e 1930 – 1938, na feagai ai le Susuga iā Sione, e lē o māua fo'i lona fa'ai'u ma le tausiga o le Ekalesia...

O le Tamā Toeaina ia Saio Aeau ma le Faletua o Lemāfoe, na avea ma Faafeagaiga a Gafa ma Saleaula, a o le Aulotu EFKS mai le 1939 - 1975 (36 Tausaga le soifua auauna).

O le Susuga iā Sāfua Vaivao ma le Faletua o Aufata, na galulue mai le 1976 - 1978 [2 Tausaga]...

Na sosoo mai ai ma le Susuga i le Faifeau Toeaina ia Iosua Leapai ma le Faletua o Faatuatua i le 1979... Na maliu le Faletua o Faatuatua i le 2004, ona fa'aauau ai lea o le Galuega ma le Faletua o Faamoemoe, seia oo ina tuumalō le Tamā Toeaina i le 2013 (34 Tausaga na tautua ai i le Alii).

Na ma taunu mai i le 2014 ma lo'u to'alu ma le mā fanau, ma toomaga pea i le Alii le Atua auā Lana Galuega Paia, ina ua mautinoa le vaivai ma le faatauvaa. **(ii) Tala o le Galuega:**

Tupe sa amata ai le Galuega = \$140,000.00

Tupe na maua i le Lotu Mulimuli o le Fale Sa Tuai [*Aso Sa 8 Aokuso 2021*] = \$42,637.00

O le Tupe na maua mai Tusi Aisi = \$38,220.00

O le Seleni na maua mai Asiga = \$25,400.00

O le Tau Atoa o le Fale Sa i le Tusiofo a le Evaeva na saini feagaiga ai = \$1,000,000.00

Nonogā Tupe i le SCB = **\$600,000.00**

O le Tupe Atoa na ave i le Evaeva mo le Galuega- \$140,000.00 + \$500,000.00 = \$640,000.00

Tupe o loo aitalafu ai le Aulotu i le Evaeva, e ao ona totogi e tusa o le feagaiga na sainia = \$360,000.00.

Peitai ua fai meaalofa mai le tofa a Vaaelua ma le Tausi iā Maria ma le Evaeva i le Aulotu, i le aveese ai o le \$150,000.00 mai le \$360,000.00.

O lona uiga, o le Tupe e totogiina e le Aulotu i le Evaeva e **\$210,000**, e ese mai ai le SCB.

A tu'u faatasi le \$640,000 ma le \$210,000 ona maua lea o le \$850,000. O le tau atoa lea olenei Falesa i lona tino mai o i ai nei (structure).

A tuu fa'atasi le \$850,000.00 + \$270,896.27 [*Tauofoga*], o le Tau atoa o le Galuega = **\$1,120,896.27**.

O le afioga i le Taitaifono Fono Tele, susuga Iosefa Uilelea FT, na fai ma sui o le Ekalesia Aoao e fofogaina le faafetai i le EFKS Saleaula mo le galuega, faapea le Afioga i le Matuaofaiva ma le Aiga Salemalama, ua fai ma viiga o le Atua, ona ia tauaao atu ai lea o le meaalofa \$20,000 a le Ekalesia. Malo le faatuatua! Faafetai le pele o Ekalesia!

Ia i le Atua le viiga e faavavau.

(Saunia e le susuga Penaia Koro FS)

FAAPA'IA LE 'SAMOA JOURNAL OF THEOLOGY' A MALUA

O le Aso Lulu 15 Iuni 2022 na faapa'ia ma tatala aloaia ai le "Samoa Journal of Theology" (Tusitusiga o Mataupu Silisili Samoa) a le Kolisi Faafaifeau i Malua. O le afioga i le Faletua ia Tiresa, le faletua o le susuga Amuia Seuala KMTA Itu o Tane, na ia ootu le lipine e tatala aloaia ai lenei faamoemoe taua. O le afioga i le Taitaifono Komiti Malua, susuga Asotasi Gu Time FT, na ia ta'ita'i le sauniga e faapa'ia ai le galuega sa fitaituga ai le aufaigaluega sa tuu faasolo mai i le Kolisi Faafaifeau i Malua e oo mai nei. Sa auai i lea sauniga mamalu le Laulau a le Fono Tele, faapea le paia o le Komiti a Malua, susuga Toeaina KMTA mai Matagaluega i Samoa, aemaise le afioga i le Alii Pule, susuga Dr. Vaitusi Nofoaiga FS, le Sui Pule ia Makesi Neemia FS, le aiga Faiaoga ma le laumua i Malua i lea taeao matagofie.

Na ta'ua e le susuga i le Toeaina ia Time, o se tasi lenei o taeao faitauina o le Kolisi Faafaifeau Malua, tainane le EFKS, auā o le Ulua'i taimi foi lenei i le Pasefika, o ituaiga galuega faapenei i totonu o Kolisi Faafaifeau. Ua latou molimau i galuega a le Agaga Paia, o Ia na taulamua, faama'ite, faataunu miti ma faamoemoega o tagata faatuatua o lana Eklesia. Ua na fa'aaoga Malua ma tama fanau a le Eklesia, i nei auga tupulaga, e susu'e le itulau fou o lona tala faasolopito. Ia ia te Ia le viiga e faavavau. Na ia fai ma sui o le Au Toeaina ma le Eklesia Aoao, e faafetaia le galuega tele sa feagai ai ma le aufaigaluega Faifeau ma Foma'i Faia'oga o le Mataupu Silisili i totonu o le Kolisi Faafaifeau i Malua.

O le Sui Pule o le Kolisi, susuga Makesi Neemia FS na saunoa i le tala otooto o le galuega, na ia ta'ua ai sa tau saili lava se taimi fetaui lelei e faataunu ai le galuega. Ma ina ua a'e se tofa i le Komiti a Malua o le a siitia le tulaga o a'oa'oga ma le faailoga o le MASTERS i Malua, o le tali foi lea i le talafeagai lelei o lenei fuafuaga, ma le faamoemoe o le Kolisi mo ana tusitusiga faa Mataupu Silisili. O le a tele se aogā o nei tusitusiga, i le avea ai ma puna'oa, mo su'esu'ega ma a'oa'oga i mataupu silisili, a susuga i Faia'oga, aemaise i A'oa'o ma soo se tasi i saililiga i Afioga a le Atua ma mataupu tau le Tala Lelei ia Iesu Keriso. Na ia faafetaia le Komiti a Malua ma le Eklesia mo le tapua'iga, lagolago malosi e ala i talosaga molia. Ia i le Atua le viiga e faavavau.

TAU FAATELEGESE TEISI - 1

"¹²Auā tou te lē o atu ma le faataalise, tou te lē o atu foi faasosola; auā e afio le Alii i o outou luma; e muli'au foi ia te outou le Atua o Israaelu." Isa.52

Ua e faalogo i se gasegase e ta'ua o le "faama'i faanatinati"? O i latou e maua ai, e feosofi atu i totonu ma fafo mai o itu auala a o pisi luga o ala taavale; latou te taumafai e muamua tu'ua le vaalele, e ui ina umi se taimi e faatalitali ai i fafo mo latou uta; e faa'e'ē faafuase'i atu le pū o latou taavale pe a mumū le molī lanu meamata, e fia lele ese pei se roketi; e 'o'omi faasoloatoa le ki o le lifi ina ia faatopetope lona alu ifo po o lona alu a'e.

E faamanatu mai e ituaiga tagata nei le isi manulele itiiti e ta'ua o le 'hummingbird'. O nei manulele itiiti e mafai ona latou felelei atu i luma, ona faaopeopea ai lea i luga o le 'ea e lē iloa se itulagi faapitoa e aga'i i ai. O latou tamatama'i apa'au e mafai ona faapepepepe faa-fitusefulu i totonu o le sekone e tasi! A o le faalavelave, o lo latou ola e na o le tolu tausaga le umi, e faatusatusa lea i le aeto e aulia le tolu sefulu tausaga. O le ā le eseesega? Ua iloa e le aeto ona faasao lona malosi, e ala i lona lele faalue i luga o peau o le 'ea ua gaosia e le Atua. O le feau faigofie mai lenei faatusa: pe afai e te fai mea faalogo ma faalagolago tasi i le malosi o le Agaga o le Atua o i totonu ia te oe, e te mafai ona soifua faafualoa, malosi faaumiumi ma a'e maualuga e aunoa se tapulaa, i tumutumu e te le'i mafaufaufauina.

Fai mai se tasi faifeau sa avea o ia ma se 'masini faasalalau attuvale' ina o talavou o ia, ma sa iloa uma e ona aiga ma ana uo. O se tasi aso na faapea atu ai se tasi o ona atalii, "Tamā, o le a ou taumafai e faanatinati ma ta'u atu le mea lenei."

Na ia tali atu, "Ua lelei. A e lē afaina, atalii, 'aua le faanatinati a e tautala faagesegese pea oe.'"

Ina ua uma se malologa umi, na fai ane lona atalii, "Ia – se'i – faagese-gese – lau – faalogo!"

Pe afai e te filifili e faatelegese teisi, e mautinoa o le a faalelei atili laasaga uma o le soifuaga, aemaise o le va fesoota'i ma isi tagata uma.

TUSI FAITAU ASO IA IUNI

Esekiel 18: 1 - 16, “2 ‘Ua ‘aina e tamā o vine moto, a e magiagia ai nifo o le fanau’. 3 O loo ola a’u, o loo fetalai mai le Alii le Atua, e lē toe fai lava e outou lena faatusa i Israelu.” f.2-3.

FAATINOINA O TIUTE TAU’AVE **(Taking Responsibilities)**

E o faatasi lava le vairusi o le tau o le pua ma lafo, le tautu’ua’i solo, ma le isi siama faaleagaga o le fe’alo’alofa’i e faatino tiute tau’ave (denying responsibilities). Na amata mai Etena. Na fesili le Atua ia Atamu ina ua lalafi, a e tulei e le tamaloa i le fafine, o ia na muamua ‘ai, a o lea ua lē lavalavā ai ma ia. Tu’ua’i e Eva i le tiapolo, o le meaola na faaosooso, a o lea ua pupula atu ai mata, auē o le malaia le mea. Fai mai na faalogo atu ona fefefe lea - o le fefe e tau’ave tiute ma tuatuagia o le lē usita’i. Faasolo mai i le isi tupulaga, fesili le Atua, Kaino o fea lou uso? Tali le tagata, O a’u se leoleo o lo’u uso? E tete’e i moliaga o le fasioti tagata, toe faafiti i tiute o le ulumatua, e leoleo le saogalemu o aiga ma itumalo. Alu le Esoto, a fetaia’i ma puapuaga ona fe’ei lea o Israelu, o Mose e leaga, o Mose e sesē, le aumai fua, a e sa manaia Aikupito, sa manaia Tanumalala e ui ina pologa, a e faasamasamanoa le mafaufau e aunoa ni faalavelave faaleaiga, leai ni tofi faalelotu, leai ni tiute tauave e faatinoina.

Lea ua oo mai i le Tafeaga, le taui o le faifili i le Atua, na la tofia ai malo faapaupau e fai ma sasa e a’oa’i ai. Ua ola a’e tupulaga, ua tofo i le oona ma le feutia o le nofo pologa ma pule’esea, le masiasi o le ola toilalo popo. Ona fausia lea o le muagagana, ‘*Ua aina e tamā vine moto, a e magiagia ai nifo o fanau.*’ O le faatusa e faaleo ai le tete’e, ua lavea fua Foaga e le’i fairmisa, ma ua satia fua le ma’ave’ave lē fua. Ua lafo le uluulu o le laau i auga tamā, o agasala nei a ta’ita’i ma tupu e pei o Aasa, Aapo ma Iesepela, Manase ma i latou na fai le amio leaga i luma o le Atua; e a Ulu tafega, a o lea ua selefutia ai Vaisigano. A o lalo ifo o lenei faatusa, o le tete’e e tau’ave ma faatino o latou tiute e tatau ai. Ua ofo Esekiel i le mea ua toso sesē i ai e Israelu upu o le tulafono faavae o faapea mai, “*O a’u o le Alii lou Atua, o le Atua fuā, o lē taui atu i fanau le amiolētonu a o latou matua, e oo i le tupulaga e tolu ma le fa, o ē inoino mai ia te a’u.*” O upu ia o loo faavae ai

le upu faatusa i vine moto ma nifo magiagia. Le faatusa na fai e lē gata i le malo i Matu, a e faapea foi i luta i Saute, na fai i taimi o Ieremia, ua oo mai i taimi o Esekiel, na fai i Asuria, fai foi i Papelonias, na fai e i latou i totonu o le Tafeaga, fai foi e na totoe ma ola a’e i totonu o Palesitina. O se talitonuga ua mautū ma maua’ a, o se mavaega tuua.

Pe a talatala teisi lenei faatusa, o le fetu’u lava lea i tua’ā ua lagomau mai ti’asā. Ua gallo la latou sailigamalo, sa tu mati’ e ai le aiga o Tavita, ua faitau na o masei, ua maua ‘ula futufuti. A e sili ona mata’utia, lo latou upuvale i le Atua. Auā o lo latou faia ane lava lea, e lē amiontonu le faamasinoga a le Atua, e lē sa’o, e lē fea le ‘ai e isi o vine moto, a e amo ai e isi le pologa. A o tua atu o nei tuuaiga uma, o le tete’e e faatino o latou tiute tau’ave. O a latou soligatulafono ma amio leaga uma o faia nei, ua lalafo uma le pogai e mafua mai i aso ua mavae..

O lea la ua fetalai le Atua, “*e lē toe faia lava e outou lena faatusa i Israelu.*” Ia taofī nei loa ma ia tapu, ia matuā se’i atoa i luga ma ona a’ a, soloia mai le gagana, mai loto ma agaga o Israelu. Ua faatāua agaga o tagata ta’ito’atasi, o le soifua o matua ma agaga o fanau, i soo se auga tupulaga. O le tagata lava ia na te tau’ave ma faatino ona lava tiute. O lau na e lūlū, o lena foi e te selesele. O le tagata e agasala e oti o ia, a o ia e amiontonu e faasaoina. E lē toe sala fua le tasi, ona o agasala a le isi, pe manua fua foi Pai ona o amio lelei a Lafai. O le lisī o amio inosia, o loo muamua ai le ‘ai i luga o mauga - e faasino i le ifo i tupua ma osiga taulaga i atua faapaupau e faia i mea maualuluga. Pe auai, pe su’esu’ e tala ai, e malo usu ai, e mautinoa lava e ‘a’ai ai i tufaaga ma fa’aalologa masani. Ma le tele o amioga matavale i le va tapuia ma le Atua, ma le va fealoa’i ma isi tagata. Pe a fai amio lelei, ona faaolaina lea - o le saolotoga moni lena nai lo le faapologa, i le saga faaseā pea i ananafi, a o sili atu lo latou leaga i le taimi nei.

O le alofa o le Atua e āutupulagā, “*Ou te alofa i le afe o tupulaga o e alolofa mai ia te a’u.*” E tofu le tupulaga ma se amataga fou. Tatou te lē noanoatia, taotaomia, saisaitia pe faamasinoina, ona o nisi aafiaga. “*O ai na te faate’ae sina mai i tatou mai le alofa o le Atua?*” Ua ia i tatou le agavaa ma le

saolotoga, e vavae ese mai ai i sootaga faaletino, e ala i le opoina o le finagalo o le Atua. O le faamanatu a Esekielu, ia ‘aua le avea le nonofo i nuu ese, e amio ai faa tagata o nuu ese. A ia tausi pea le feagaiga ma le Atua, o loo i ai lava o Ia i le tafeaga.

Na fesili le au soo ia Iesu, po o ai e agasala - o matua po o le tauaso? Na tali Iesu e lē o se agasala a se isi, a e ia fa’aalialia ai galuega mamana a le Atua. Na faapupula e Iesu mata o le tauaso, o le faatinoina lava lea o ona nafa, o ona tiute tau’ave na afio mai ai-e faaola ma faasaoloto le tagata saisaitia i le pologa ma le pogisa o le agasala (Ioa.9:1-12).

E lē gata la ina faasagatonu e le Atua le faatusa i vine moto, a o le folafolaina lava foi lea o ataata o Taulelei- o le toe fuata’iina o le ola o le nuu, e faasolo atu i le toe a’e o le tafeaga, ma le faaolataga aoao tetele o le lalolagi atoa.

Ua maitauina i taualumaga a le tele o faigamalo le faamamafa i le faatinoina o tiute tau’ave - ta’ita’i, faauluuluga e oo i tagatanuu uma, e tusa o tautoga ma folafolaga ua fai i luma o le Atua a o molimau le atunu - o se anavatau lelei e ao ona faamalosia pea. A e o lagonaina pea le vaivaiga o le tau o le pua ma lafo; ma o le tatalo faa-Esekielu, ia taofia loa e outou ona fai lea faatusa, a ia saga’i ane ‘ai o le tai e soosoo tau’au e faatino tiute tauave mo se manuia o le atunu. O loo faaseā pea nisi i le Faama’i o le Koviti-19, aemaise le tete’e i Tui puipui. O tiute tauave o tagatanuu moni, e tatalo ma usita’i, anapogi ma lagolago i fuafuaga ua faia e ta’ita’i totofi e le Atua; o le tiute o le Atua e faapa’ia ma na fa’aaogā mea faatauvaa e fa’aalialia ai Lona mana faamalolo; afai e i ai ni lape, faitalia o Ia ma feliua’i e avea ma auala o puipuiga ma tino mai ai Lona faaolataga.

E i ai nisi taimi e lagona ai le i’uleo o le tautu’ua’i i totonu o le tatou lotoifale faa EFKS pe a tula’i mai pefea; e tulei e se tasi itutino o le Ekalesia le mafuaaga i se isi itutino, po o va faa-komiti, faa-Matagaluega, po o le aufaigaluega foi i susuga Faifeau ma Faletua, tainane o A’oa’o Fesoasoani po o Tiakono. Pe a lē o le aiā fua i tiute tau’ave o le isi, o le lē faatinoina o ona tiute e ao ona fai. A o se faamanatu lelei a Esekielu, ina ‘aua le faia e le tasi se mea e magiagia ai oloa o le isi, ma punou ifo le itutino ia e galuea’iina

ona nafa ua valaauiina ai. O nisi taimi ua tu’ua’i i I’ugafono ma le Faavae, faapea o matua ua fai i lagile folaua, e ana le tofa ma le utaga. O se tasi foi o tautuua’iga malosi o faia i nei aso, e faasino i le ō ese o tagata lotu EFKS - o ese i isi tapuaiga, pe o ese ua leai lava se toe lotu. O le mau, e mafua ona o le tele o mea fai a le EFKS. A e o le upu moni lava lena! O i latou ua faatafea, tuumuli ese mai le EFKS, o i latou ia ua maua i le faavaivai ma le faapalapala, le paie ma le musuā, ua latou lē gafatia ona amo le satauro, ua lē mafai ona osi taulaga ma faatino tiute tau’ave, e tusa ona valaauiina ai i totonu o le Ekalesia Faapotopotoga Kerisiano Samoa. O le Kerisiano e fia ola fifilemu aunoa ni tiute faamamafa ma faalavelave atu i lana faasamasamanoa. O nisi foi e fai mo latou faanoi le itu i faiga taulaga, e ufiufi ai le nanau i tofi, le mamalu ma le pule, faapea le ‘oa o le lalolagi, e ala ai ona vavae’ese ma faatuina nisi Lotu. Tau solomua foi nisi o matua sa latou inumia le suamalie o faamanuiaga, ma tama fanau sa latou maua le atamai ma le agavaa mai totonu o le EFKS, ua latou toe fulitua mai, i le lima na fafagaina i latou. Mata o uiga faa-tafeaga uma nei, o vaivaiga faa-‘ai vine moto ua fautuaina e Esekielu, ina ia taofia loa ia lē toe faia, ne’i pipisi faa-vairusi atu i isi itutino ma isi augatupulaga.

O totonu o le Tafeaga, na oso a’e ai le la o le taeao fou, na totogo a’e ai faa-tatupu, faa pogai i le nuu naumati, le faamoemoega lelei, e lē gata mo Israaelu a e mo le lalolagi atoa. O le faaolataga e toe laga ai le toilalo popo, e se tama fanau a Israaelu mai le gafa o Tavita. O loo ta’ua e Isaia o le Mesia puapuagatia. Ao Esekielu, o loo ia mamanuina lenei faamoemoe, i le taofia e le Atua o le faatusa lenei i vine moto, ma le magiagia o nifo. E lē toe afaina se tagata, o se matua poo se fanau. O le Atua lava Ia o le a ia tau’ave tiga ma faanoanoaga, o le magiagia matuitui o puapuaga, ona o le ‘ai vine moto o Lona nuu, ma agasala a i tatou uma. Ua a’e ai la tatou tafeaga, ua sa’oloto mai le nofo pologa i le faafanoga e faavavau. Ina ua afio mai Lona Alo pele o Iesu Keriso, ua malii i le satauro, tanumia i le tuugamau, a e na toetu mai le ulua’i aso o le vaisapati. Ia ia te Ia le viiga e faavavau. (*Faatonu Sulu*)

O LE PEROFETA MULIMULI

(*O le Tala faafagogo faasolo ua faaSamoaina mai le tusi, The Last Oracle, tusia e James Rollins*)

Na talanoa atu Iuri i le telefoni. "O le a ou sailia ia maua le teine," o lana tala maumaututū lea, a e ua na o se folafolaga ia te ia lava nai lo i lona ta'ita'i to'atama'i. Na ia tuu i lalo le telefoni ma faasaga atu i le tamaloa umī, ma ia toe liliu ane i le faa Peretania. "Ua maua mai se tala i lo'u afafine?"

"E faamalie atu e leai. Ua uma ona vā'ili le paka atoa. E leai se faailoga e tasi ua iloa."

Na faalogoina e Iuri e pei ua goto atu lona fatu.

Na tau faatali teisi le si'ufofoga o le ta'ita'i sikulakī. "Peitai, e ao ona ta'u atu. E i ai le lipoti o se teineitiiti e tutusa ona faamatalaga ma lou afafine, faapea sa aveina i se taavale i tafatafa o le auala i fafo i le itu i saute."

Na tu vave i luga Iuri, ma ona mata ua faalautetele. Na sii a'e i luga se lima, e faapea atu ia onosa'i mai. "O loo tuliloa e le Ofisa o leoleo o le Itumalo Kolomopia le mataupu. Atonu o se tala sesē. Ua leai se isi mea matou te mafai."

"E tatau lava ona i ai nisi a outou gaioiga e fai."

"Tofa malie lau afioga. O le isi mea, o lo'u foi mai nei na logoina mai ai a'u, o loo i ai se tasi o le FBI ua faatonuina se faafeao mo oe. E lē o toe mamao a e taunu mai. Latou te ave oe i lou fale tali mālō."

Na i ai le matega ia Iuri, o loo i ai le lima o Mapeletope i le fuafuaga mulimuli lea na ta'ua. "Faafetai tele mo la outou fesoasoani." Na aga'i atu Iuri i le faitoto'a ma tago atu i le 'au e tatala. "Ua ou mana'omia lava sina 'ea mālū."

"E lelei tele lena. E i ai le nofoa o loo i fafo."

Na ulufafo ese Iuri mai le ofisa sikulakī. Na ia iloa atu le nofoa i le paka ma savali agai i ai, peitai na lilo atu loa o ia mai le faamalamā o le ofisa, ona ia fa'aauau atu lea i tala atu o le nofoa ma faasolo atu i le itu e ulufafo ai mai le paka.

E le'i mana'o Iuri ia i pulea mai o ia e Mapoletope. Aemaise i le taimi lenei. O lena vale na o sīna vaega itiiti na te iloa o le mea atoa o loo tupu, a e tau ina ia maua pea le silafia e le vaega mo Saogalemu o le Unaite Setete. E leai ma so latou masalosalo i le suiga mata'utia o le a i ai le lalolagi i nai aso o muamua.

E tatau ona ia maua Sasa a e le'i oo i ai Mapeletope. E na o le tasi lava le auala e fai ai.

A o ia ulufafo ese atu mai le paka e ui atu i se poloka a leoleo, na ia toe vili lana telefoni ma fai fesuia'iga o numera. E pei ona tupu muamua, na vave tali mai, a o le taimi nei o le masini tali telefoni.

"O le vaega tali telefoni lenei mo le Ofisa o Arako. Faamolemole tuu mai lau feau..."

O Arako le igoa faauifi mo Iasoni. O lea igoa – Arako – na filifilia ona o le igoa lea o le vaa o Iasoni, e tusa ma tala tuu faa Eleni.

Sa lūlū le ulu o Iuri ona o lenei mea faavalevalea a o ia faatali mo le 'īmai o le telefoni. Faato'ā ia fasiotia se isi o i latou i nai itula talu ai nei. Lenei ua ia manaomia le fesoasoani mai le vaega faalilolilo o saiennitisi Amerika. Ma na te iloa le auala e maua mai ai. Pe a toe foi i tua i le Taua Mālūlū, sa feagai malo e lua ma le taua o tausinioga po o ai e sili i mea tau tekonomosi, sa lagolagoina itu taitasi e a latou vaega 'au faamiliteri. O auupega na fa'aaogā i lea taua e lē na o le atamai i mafaufauga, a e sa sili ai ona aafia auala mata'utia ma faiga faatevolo: o le faaleaga ma faatāma'ia o tagata ma mea totino, o le sailia o faamatalaga i faiga faamalosi ma taufaamata'u, o le totogi o tupo e maua mai ai faamatalaga. Peitai ona o alii ma tamaitai e faa-saienitisi, sa galulue itu e lua faa-tutoatasi mai le militeri. O le faasologa mai o tausaga na latou silafia lelei ai itu tāua e lua: sa i ai lava laufanua faa-mataupu e taofi tutusa ai, ma le isi e sili ona tāua, sa i ai le laina mautū e matuā tapu ona sopo'ia e se isi.

Ina ua alia'e mai lea tulaga, na faatuina loa se auala o fesootaiga, o se faamau o le femēmēa'i. Na tautala atu Iuri i lana telefoni, ta'u atu i ai lana numera ua faavasegaina, mulimuli atu ai ma se upu faailoga e tala i tua i le Taua Mālūlū.

"Panatora."

8:38 aafiafi

Na pupusa a'e le afi mai le potu tele o le Tagavai Teuteuina i Fetu.

Na taofiofi e Karai lana vaega i totonu o le potu i autafa o le vaega ogatotonu o le fale mata'aga. Na latou tosolina atu ovalola vali fale ma faamaulu i luga o latou la'ei ma pupuni o latou foliga i puni fosoga. Na faa-pisipisia foi e Karai vali i o latou ofu.

Na ia faalagolago ma pulaloa atu i tua i le potu o le tagavai. Sa mu ma tiga ona mata i le asu o le afi, a e na ia iloa atu lava le sivasiva a'e o le afi ma sosolo atu i le faaputuga o faamanifi vali na ia sasa'a solo i le fola laupapa o le potu. E le'i umi a e ola mai tinei afi o faalavelave faafuase'i. Na liligi malosi ifo le vai mai palaka o i le taualuga. Sa tatagi leo tele a'e ma le faaililo.

Na faatali teisi Karai se’ia mautinooa o loo mago ma saogalemu pea le pusa tioata o loo teu, puipuia ma faalauiloa ai le tagavai. Sa ia iloa o lea faalauiloa o se pusa o loo puipuia faa-si’osi’omaga fuafua e teu malu ai faailoga mo auga tupulaga fai mai. A e mo le taimi nei, o le pusa e tatau ona puipuia lelei ai le tagavai mai le asu ma le vai.

Ua malie o ia o loo saogalemu le measina, ona faasaga atu lea o Karai i le avanoa talaloa i le ogatotonu. Ua faaopoopo atili le fe’ei solo ma le valaau fia ola a tagata faigaluega sa fememea’i ona o le asu. Ua leva ona faapopoleina le au fai konekarate i le salalau mai o le tala tau faafefe i se pomu i totonu o le maota. A o lenei ua tula’i mai foi le lapataiga o le afi ma le malosi o le asu.

Sa tilotilo atu Karai aga’i i le ulufafo ma totonu o le avanoa talaloa.

Talu ai le faasalalauga ina ia agai uma mai i le ulufafo e tasi lenei, sa tumutumu, fetineia’i ma tautulei solo ai alii ma tamaitai. O le toatele na featofa’i solo mea faigaluega ma ato faigaluega. O le fememea’i sa fetuleni ai tagata agai i le faitotoa, sa i ai alii faa-aaupegaina na latou siaki faasolosolo i latou e ulufafo, e aofia ai le faa-sosogi i ai o ni taifau Siamani e lua. “Tatou o,” na fai atu ai Karai.

I lalo o le ufiufi o le asu ma le vevesi, na faatasi atu ai le toatolu i le toatele o fetuleni atu. Sa latou taapeape ina ia faaititia ai le masalomia o latou ona o le tutusa o a latou teuga na lalafi ai. Sa pei lo latou faatasi atu i le anoanoa’i fememea’i, o le oso atu ma afatia i se sami loulouā ma papa i le gataifale. E ui ina sa tulei, fetosoa’i, taso’ a ma tapole solo, a e sa taula’i pea le vaai a Karai i le isi toalua.

Sa gasolo pea le vevesi i le faitoto’ a. E ui ina i tulaga soona nunumi, a e sa taumafai pea alii tiute ina ia tumau le filemu ma sologa lelei. Sa fa’aaau siaki, a e na faasolo ina vave. O ta’ifau na tau taofiofi ma ōu faasoloatoa i le fe’ei ma le vāvāō o tagata.

Na taofi mau atu e Karai lana ato sa i lona tau’au, ma oomi atu i lona fatafata. Pe afai lava e oo i ai, o le a ia osofaia le laina o loo tumu e pei o se fulupeki ona sosofa atu mo se sikoa.

I le itu, na iloa atu ai e Karai ua tulei atu Elisapeta i le faitotoa ma taofi mai i lima o se tasi o leoleo. Sa su’esu’ e ma siaki faatopetope ma uuna’i atu i le itu e ulufafo ai. Na ia ui atu i autafa o le tasi taifau, na ōu ma fia oso atu a e na taofi e lona ta’ita’i. A e sa le’i

sogitia e le maile lona nanamu. Sa na o le ita ma lē malamalamo le meaola i le vevesi solo o tagata. O le manogi fou o le vali ma le asu na fesoasoani e punitia ai le sasala o faamanogi a Elisapeta. Na tevateva ese atu mai le poloka a alii tiute, ma agai atu ma taunuū atu ai i fafo i le malamalamo.

I le isi itu, na oo atu ai Kouasaki i le laina e siaki ai. Na fesoasoani i lana toniga taufaasesē, le tofu o lona lima ma le kalone vali, sa tele ina fa’aaogā e taso’ a ese ai tagata mai le auala sa ia ui ai. E oo i apa vali sa matala.

Na taofi le mānava a Karai. Sa lē lelei i lana vaai. Sa le’i faalavelave le vevesi i le su’esu’ega ma siaki o loo fai, e pei ona sa ia fuafuaina.

Na uma le su’esu’ega o Kouasaki, ona faasino atu lea i fafo ma le fale.

Na tulei atu i fafo e Karai le faitotoa ma la’ua fetaia’i ma le alofilima o se tasi o leoleo.

“Tuu i luga ou lima!” na faatonuina ai o ia. Na faamalosia le poloaiga i le tuu mai o le fana a le isi leoleo i lona fatafata.

Na su’e faanatinati e lima lona tino. Mai lona ulu seiā oo i ona tamatama’ivae. O le mea e laki ai, sa ia tia’i lana sulufana i lona vae, i se tasi o pusa lapisi o le fale.

Ui i lea...

“Tatala lau ato!”

Na iloa e Karai e leai sona alofaga e tetee ai. Na ia tuu ifo i lalo lana ato ma tatala le sipi. Na ia tuu mai i fafo le mea e tasi sa i ai: o se faalamolemole patupatu eletise itiiti. Na lūlū atoa le ato ina ia mautinooa ua gaogao – ona faasino ese atu lea o Karai i fafo.

A o pasia e Karai le taifau sa ōu, na ia maitauina se alii o tu ai i autafa, o la’ei i lona suti. E leai ni aaupega sa i lona tino. Sa i ai se seti mo fesootaiga o telefoni o sulu i ona taliga. Na fai ana faatonuga, e manino o ia sa pulea taualumaga. Na manatua e Karai sa ia vaaia foi le alii lea i le vaega e taula ai vaa o le fale mataaga o le natura.

Na pasia e Karai o ia, ona ia iloa atu lea o ona faailoga o faapipii i lona peleue.

O le Ofisa o le Tofa Mamao mo Puipuiga Malu.

Na maitauina e Karai le suafa matamata tetele: MAPELETOPE.

Sa fa’aaau faatopetope atu Karai i fafo a e le’i maitauina o ia. Na ia maua atu le isi to’alua, ina ua mamao ese ma le fale mataaga ma le vevesi, ma feiloiat atu pei lava o nisi o le aufaigaluega ua toe mafuta. Na toe faapipii e Karai lana leitiō uealesi i

lalo o lona auvae. Na taumafai e fesootai le Ofisa o le Sikima.

Mulimuli ane ona tali mai lea o se leo masani.

“Karai! O fea o loo e i ai?”

O Penita Kolouē.

“E leai se taimi e faamatala atu ai,” na fai atu ai Karai.

“Ou te mana’omia se taavale lē faailogaina i le tulimanu o le auala Sefulufā ma le Faavae.”

“O le a i ai iina le taavale.”

A o agai atu Karai i le vaega e aveesea ai, na ia aapa atu lona lina ia Kouasaki. Na tuu mai e le tamaloa laulauā se tasi o kalone vali. “Na o lo’u fefe i le avega o lenei mea.”

Na talia e Karai le apa vali ma le faafetai. O le ta’ele o le apa, sa aliali a’e ai le ulupoo uiga ese. Sa popole lava Karai ina ne’i masalomia e se tasi, ma su’esu’e auiliili totonu o apa vali, aemaise ona sa ave e se tagata sa pisipisia atoa lona ovalola i le lanu lava e tasi. Pe afai e fufulu mamā le ulupoo, o le a latou maua loa ni tali mautū.

“Faafetai ua tatou sao mai,” o le tala lea a Elisapeta ma le mapusela tele. Sa le’i i ai se tali a Karai.

Na ia iloa lelei e le’i tātāi ona te’ a ese ma faafitauli, ma o loo mamao lava mai se taunuuga.

O le ‘afa o le taamilosaga i le isi itu o le lalolagi, na ala a’e ai se tamaloa i se potu pogisa e leai se faamalama. Sa i ai sina malamalama na susulu mai le faaputuga mea faigaluega i le tuaoi. Na ia faalogoina le tātā ma le ‘emo’emo o le masini e siaki ai le fatu. Na taia lona isu i le manogi o vailaau tui ma faamamāfale. Na ia nofo vave a’e i luga ma le niniva. O nai malamalama ititi na fe’ausi solo pei o ni i’a lele i totonu o le moana i le tuleva o le po.

O le vaaiga lea na ia sa’euina i luga se mea sa tanumia. O se manatuaga.

...o le malamalama i vai pogisā...

Na ia taumafai e nofo a’e i luga, peitai sa noanoa ona tapulima i taofi o le moega. O le moega o se falema’i. E oo i ona lima sa lē mafai ona faasa’oloto mai le ‘ie’afu. O lona vāivāi tele na ia toe taoto ifo ai i lalo. Pe mata sa ‘ou a’afia i se faalavelave?

A o ia to lana mānava, na ia faalogoina o loo i ai se tagata o maitauina o ia, ma o se lapataiga na matuitui ai o ia. Na faliu lona ulu, ma iloa faanenefu atu se avanoa mai o se faitoto’ā. O se ata pogisa o se tagata na minoi mai i totonu o lea vaega. Na lagona le sasalu o se seevae i maa o le fola. Ona lagona lea o se musumusu. I se gagana ese. Faa-Rusia, mai le leo.

“O ai lea?” na ia fesili ai ma le leo ‘o’olo. Na mū lona fa’āī, pei sa ia foloina se asita.

Ua sāō. O le pogisā sa pei o le oti ua leai se toe gaioi. Na ia faatali teisi, a o taofi lana mānāva.

Ona susulu malosi mai lea o se malama i tafatatafa o le faitotoa. Na faa-pogisa ai ona mata, sa tutui lana vaai i le tiga. Na tau sii a’e lona lima e pupuni ai ona mata, sa galo ia te ia o loo saisai ona lima i le moega. Na ia ‘emo’emo ese ona mata mai le malamalama sa sau mai se peni moliuila itiiti. Na atagia ai fuatino o ni tagata itiiti se toatolu o ulufale mālie mai i totonu o lona potu. O tamaiti uma. O se tama e sefululua pe sefulutolu tausaga, sa taofia le mōlī ma pupuni se isi teineitiiti e tausaga pe lua e itiiti ifo ai. Na mulimuli mai ia i la’ua se isi tama e laititi teisi, e lē silia ma le valu tausaga. Na latou faalatalata uma atu i le moega e pei o loo aga’i i se pa o se leona.

O le tama umī, e manino o ia le ta’ita’i, na faasaga ane i le laitiiti. Na musumusu faa-Rusia i ai, e faasenanui a e manino o se fesili tāua. Na ia valaau le igoa o le tama laitiiti. E pei lava le igoa o Pita. Na luelue le ulu o le tama, faasino i le moega, ma memumemua faa-Rusia i le mautinoa ma le to’ā o lona leo.

Na feliusiu’i o ia i lona moega, ma i’u ina ‘e’ē atu loa, “O ai outou? O le a le mea tou te manana’o ai?”

Na faafilemu atu o ia e le tama umī ma pulato’ā atu i le avanoa o le faitoto’ā matala. Ona ta’ape lea o tamaiti ma o ane ua tutū faataamilo i autafa o le moega. O le ta’ita’i ma le teineititi na amata ona la’ua tatala nonoa o ona lima. Sa faatali teisi le tama laitiiti, ma le pupula vātetele o ona mata. E pei o ana uo, o le tama lea sa la’ei se ofuvae ‘ō’ō ma se mitiafu faa’efu’efu i totonu o se ofutino leai ni lima, faatasai ai ma se pulou na su’i. Na pulaloa sa’o atu le tamaititi lea ia te ia, aunoa ma se minoi, e pei o loo faiata se faailoga i lona muāulu. Na nofo a’e o ia i luga ina ua matala ona lima. Na toe taavilivili le potu i lana vaai, a e lē pei o le malosi sa i ai muamua. Na tuu a’e lona lima ma faasolo i lona ulu, a o taumafai e faasa’o lona nofo. Na ia lagona i lalo ifo o lona alofilima, ua molemole lona ulu, ma se laina o filo o mainiini i tua o lona taliga, na faamautinoa mai ai lona tulaga niniva o i ai. Pe mata sa sele faamamā o ia mo se ta’otoga?

Ui i lea, a o faasolo lona alofilima i le molemole o lona ulu, na ia iloa se faalogona masani, o le natura.

IA TAU FAATELEGES - 2

“¹⁶Ou te tuuina i Siona le maa e fai ma faavae... o lē faatuatua ia te Ia, e lē popole lava ia (e lē faanatinati). ”Isa.28.

A e le’i taula’i lona mafaufau i lenei feteenaiga, na ia toso a’e le isi ona lima ina ia vaai atu i ai. Pe sa ia taumafai i ai. Auā na gata lona lima lea i se pona i lona tapulima. Na oso le tātā malosi o lona fatu i le te’i. Ai lava sa lavea o ia i se faalavelave mata’utia. O toega o lona lima na faasolosolo atu i le malū i lalo ifo o lona taliga, e pei o loo tau tagotago e faitau le patupatu o tusi a tagata tauaso. E mautino o sona taotoga e le’i mamao atu. Peitai ua malō ma ua leva ona toe lelei lona tapulima. U i lea sa pei lava na te lagona ona tamatama’ilima. Le lagona e u’u mau faatasī mai i se moto i le ita ma le fefe.

Sa laa ese atu i tua le tama umī mai le moega. “Sau,” na ia fai atu ai i le faa-Peretania.

Mai le natura faalafilafi o lona faa-saolotoga ma le tulaga faalilolilo o gaioiga a ona lavea’i, na ia lagona ai o loo i ai o ia i se laasaga lamatia. Na ia se’ese’e ifo i lalo mai lona moega, ma tu ona vae i luga o le fola maa mālūlū, a o ‘ofu i se ofu talaloa manifinifi a le falema’i. Na tifatifa solo le potu ona o lea gaioiga. Auoi... Na masua atu ni gugulu mai lona leo. “Faanatinati,” na tauanau atu ai le tama umī.

“Faatali laia,” na ia augani atu ai, a o taumafai e mānava mai se ‘ea i totonu o ona māmā. “Ta’u mai po o le a le mea lea e tupu.”

“E leai se taimi.” Na laa ese le tama umī. E pa’e’e, na o ivi. Na ia taumafai e faa paū lona leo pei se ta’ita’i, peitai o le ‘o’olo i totonu o lona leo na ia ta’u mai lona talavou ma lona fefe. Na ia tago a’e i lona fatafata, ma faailoa atu o ia. “O lo’u igoa o Menia Konasetanitino. Ua tatau ona e sau. A e le’i tuai tele.”

“Peita’i o a’u... ou te lē...”

“Ioe. O lena e te faanenefu. Mo le taimi nei, ia e iloa o lou igoa o Monike Kokalise.”

Na lūlū lona ulu, a o ia memumemu tau lē lagona. Monike Kokalise. E leai ma se uiga o lenei igoa ia te ia. A o ia taumafai e faaleo atu lona tetee, ina ia faasa’o le mea sesē, na ia iloa e leai se one o i ai i lana fana, na o se pulu ‘ō’ō sa masani ona i ai lona igoa. Na omia lona fatu ma fufusi pei o se pona ua nonoa. Na pūti lana vaai i lona fefe. E faapefea ona tupu lenei mea? Na ia toe iloilo filo na su’i i ona tamatamailima. Pe mata sa lavea pe sa taia lona ulu?

O se faalavelave? Na ia taumafai e manatua tala atu, a e le’i fafagu a’e o ia i lenei potu, peitai e aunoa se mea na te manatua, o se fanua tuulafoa’i.

O le a le mea na tupu?

(fa’aaauau Sulu Samoa Iulai 2022)

O taimi uma lava e te sui ai i le ‘kia faanatinati’, e te tuuina atu ai se faailoilo tau ‘tulaga o faalavelave faafuase’i’ i lou tino. Ona tali mai lea e ala i le tutupu o homone atuatuvalē faapitoa o le tino e sauniuni ai mo ni faalavelave e tutupu. E lē iloa e le tino ona faavasega le eseesega i le va o ma’i o lamatia ai le tino, po o le mata’utia o le faamalolo mai le galuega, po o nisi lava ituaiga faalavelave e avea ma avega mamafa e atuatuavale ai. Na o le pau le tulaga na te iloa, ua tatau ona fai sau gaioiga, ma na te saunia oe ina ia mafai ona faafetaia’i le mamafa o faafitauli. O se tulaga lelei pe afai e saunia oe pe a lamatia faaletino. Peitai pe afai e osofa’ia pea e le ma’ale’ale o faafitauli ma faalavelave, ona tusa lea ma se faipelega e sefululima taamilosaga aunoa se malologa. Ma i’u ai i le osofa’ia ma pē ai le fatu, oso maualuga o le toto, le fiva, le suka, le galogalo o mea ma isi laasaga pagatia.

Pe se a se togafiti? A e maua se fofot? **I O E!**

I: Ia lagona. O: O e talitonu? E: E tatau ona sui.
Ia e lagona taimi uma e te ausia ai le ‘kia maualuga’ o lou loto ma le mafaufau, ma lau gaioiga e tatau ona fai pe a lamatia e le faanatinati. Fesili ifo ia te oe, ‘Pe na faapefea ona lavea’iina lenei tulaga?’ Ia e talitonu e mafai e le Agaga Paia ona avatu le manumalo ia te oe pe afai e te fesili ia te Ia.

E tatau ona sui le saosaoga e te ola ai. Taumafai e faatelegese teisi, i soo se mea e fai. ‘O le naunau e fau ai le gau o maumau’ (haste makes waste). E tutupu faalavelave faafuase’i maumau ai le ola ma meatotino ona o le soona saosaoa o taavale. O faapefea ona e faitauina le Afioa paia a le Atua ma mafaufauga faaleagaga o faavae mai ai? Pe afai e masani ona faitau faanatinati, tau lava ina uma, e fautuina se suiga ina ia lava lelei le taimi e faitau, mafaufau loloto ma fesili i le Atua, “Se a le mea o loo e fetalai mai ai ia te a’u? O le a le suiga o loo e finagalo ai mo a’u? E faapefea ona faaleleia lo’u olaga, ma aogā atili ai mo oe?”

Ia mautino, e lē faanatinati le Atua, e lava Lona onosa’i e faatali mai ai tatou te faimalaga, sailimalo ma nutimea faatasī ma Ia, i le saosaoa talafeagai lelei ma i tatou. O le faatelegese, o le faailoga o le faatuatua e leai se mea e nanati ma polepolevale ai.

NA O AFIOGA E TULEI MAI FOFOGA O LE ALII

OLE OLIOOLIE LĒ TUATUAGIA

“⁴Matou te tusi atu foi nei mea ia te outou ina ia atoatoa ai lo outou olioli.” I Ioa.1.

Ua tatou masani ma le faantuaga faa soifua maloloina e faapea, o le fiafia o le mafaufau ma le loto, o se vailaau aogā tele e fofo ai le mau gasegase o le tino. A o le mau a le Tusi Paia, pe afai e aunoa le olaga ma le fiafia/olioli, e faapena foi ona leai se malosi. “¹⁰auā o le fiafia i le Alii o lo outou malosi lea.” Neemia 8. O lo tatou olioli e lē tatau ona faavae i mea e tutupu i o tatou autafa, o mea e si’osi’omia ai i tatou; a e tatau ona faalagolago i lo tatou fesootaiga ma Iesu Keriso, o le olioli e faavae i lo tatou faiā ma lo tatou Alii Faaola. O se tasi o faaliliuga o le faiatuga mai le Tusi a 1 Ioane 1, “⁴E mafai ona faatumulia atoatoa i tatou i le olioli.” O lenei fuaitau na fa’aliai ai le finagalo o se tasi faifeau su’esu’e o le Tusi Paia ia Reimar Schultze e faapea: ‘E le’i faia e Ioane lenei molimau ina ua sologa lelei ma manuia mea uma, a e peita’i na faia i le taimi, na matua’i masofasofa ai mea uma: (i) Ua fasiotia faa-maturo uma ona uso a apostetolo. (ii) Ua faatafuna’iina e Roma le malumalu i Ierusalem, ua leai se maa e tuu i luga o le isi maa. Na tusia e se tasi o molimau na vaai i ai, o Flavius Josephus, “O le toatele o le aofa’i ma le ogaoga o mea na faaumatia, e sili atu nai lo puapuaga uma ua faia e tagata, pe na auina mai e le Atua i le lalolagi.” (iii) E toatele Iutaia ma Kerisiano ua avea ma tagata sulufa’i. O le umi o le soifua fuafuaina i lea auga tupulaga, ua tapulaa i le fasefulu ma le lima tausaga, a e tusa ma le 25% o tagata i Roma o pologa i latou. (iv) O Ioane lava ia sa faa-aunu’ua i le motu o Patamo, e leai ni foliga o faamanuiaga ma faamafanafanaga faalelalolagi o vaai atu i ai... leai se mautinoa e aulia le isi aso. Ina ua tumu le ipu o puapuaga, na faatonuina o ia e le Atua ina ia fa’ali atu i le lalolagi atoa le paoa, le malosi ma le pule a’ia’i o le Tala Lelei ia Iesu Keriso ma le Ekalesia Kerisiano i mea uma... O ana tusitusiga, i le faasino i la tatou savali o aso taitasi, ua na tuuina a’e ai i se tulaga aupito maualuga, o mea uma na fuafuaina e le Lagi ina ia fa’aliai i le Upu: pe afai tatou te maua le mafutaga faa-apostetolo, o le a atoatoa lo tatou olioli. Tou te lē manaomia ni laasaga o sologa manuia ma lelei, ina ia tupu ma tino mai lea tulaga.’ O loo folasia manino e le Salamo 16 lea mau, “¹¹E te faailoa mai ia te au le ala o le ola; o i ou luma le fiafia e malie ai; o i lou itu taumatau le olioli e faavavau.”

FAAMAONIA LOU FAATUATUA

“²⁹E leai se isi atua na te mafaia ona lavea’iina faapena.” Tani.3.

O le tala i tama Eperu e toatolu – Sataraka, Mesako, Apeteniko – i totonu o le ogaumu aasa, e a’oa’o mai nisi o a’oa’oga tāua mo i tatou, e pei o nei:

(1) *O le mata’u i le Atua ma faia Lona finagalo e te ono oo ai i puapuagā.* Ia ‘aua ne’i i ai sou manatu e fiafia mai le lalolagi ia te oe, pe a e mulimuli i ala o le Alii. Vaai foi i le soifuaga o Iesu: “⁴Sa ia te ia le ola; o le ola foi o le malamalama lea o tagata.

⁵Ua pupula mai foi le malamalama i le pouliuli, a e le’i manumalo i ai le pouliuli.” Ioa.1.

(2) *E i ai le Atua faatasi ma oe i ou puapuagā.*

Ina ua vaai atu Nepukanesa i totonu o le afi, na ia faapea ane, “²⁵Faauta, ua ou iloa tagata e to’afā, ua tatalaina, ua lē afaina lava i latou; ua tino mai lona to’afā ua pei o se Alo o le Atua.” Tani.3.

O le afi na fuafua e susunu ai tagata faatuatua i le Atua, ua na susunuina maea na saisai ai i latou ma faasaoloto ai. Ia e loto tele! Atonu o faalavelave, faafitauli ma puapuaga o loo e i ai nei, ua latou tuuina oe i totonu o se tulaga pei o se ogaumu aasa, peita’i o loo i ai faatasi le Atua ma oe (pe afai e te faatuatua i ai), ma na te lavea’iina oe mai lena tulaga faigata, e aumaia oe i fafo ma le manumalo.

(3) *O ou faalavelave e avea ma au molimau.* O loo matamata, vaavaai ma maitau atu oe e tagata. Ua lē aogā ma ua toilalo le malosi o mea na latou faalagolago ma talitonu i ai, a e ua latou vaavaai atu ia te oe pe faapefea lou faatuatua ma mea o loo e faamoemoe ma faalagolago i ai. O lou faatuatua i le Atua ma Lana faafelavei i ou puapuaga, o le a pa’i atu i o latou olaga, e sili mamao atu nai lo lauga ma mataupu silisili e te tautala ai. Na silafia uma e Papelonie le faatuatua o tama Eperu. A e na latou fia iloa, pe mata e oo i totonu o le afi aasa, le mafai, le malosi ma le aogā o lea faatuatua? Ioe, e mafai!

(4) *O le tele o ou puapuagā, o le tele foi lena o ou manuia.* “³⁰Ona tomai lea o Sataraka, Mesako ma Apeteniko i le itu malo o Papelonie, i le pule a le tupu.” O le faiga faavae lenei faale Tusi Paia e mafai ona e mulimuli ma talitonu i ai: pe afai e te fa’ali ma faamaonia mai lou faatuatua i taimi o tofotofoga ma puapuaga, o le a siitia maualuga oe e le Atua i isi laasaga maoa’e o ana faamanuiaga.

Manatua le tala ia Iopu? “¹⁶Ona ola pea lea o Iopu, ina ua mavae o ia mea, o tausaga e tasi le selau ma le fa o sefulu. Ua ia iloa foi ona atalii, ma atalii o ona atalii, e oo i tupulaga e fa.” Iopu 42.

OLE FAATUFUGAGA FAALEATUA-

OLE TUUINAATU

^{“¹⁷}O le faatuatua na fai taulaga ai Aperaamo ia Isaako, ina o tofotofoina o ia...ua ia avatu ma taulaga o lona atalii e toatasi.” Epe.11.

Ile Kenese 12, na poloai ai le Atua ia Aperaamo ina ia tuua lona nuu, lona aiga ma le saogalemu o lona olaga i lea taimi. Ina ua ia tali atu “Ua lelei!” i le Atua, na ia savalia ai le ala e le’i masani ai mo se taunuuga e le’i mailoa, e faavae i le malosi o se folafolaga. Sa le’i toe faatali loa le tamā pateriaka ua fitu sefulu ma le lima tausaga, a e alu “^{“4}e faapei ona fetalai mai o le Alii ia te ia.”

E lua sefulu ma le lima tausaga mulimuli ane ona fanau mai lea o Isaako; le vavega ofoofogia o le tama na fanau mai ua toeaina Aperaamo ma loomatua Sara ua te’ a ma le tu a fafine. Le tama na te faataunuu le folafolaga a le Atua na fai ia Aperaamo, “^{“4}ou te faatoateleina foi au fanau pei o fetu o le lagi, ma ou foaiina atu i au fanau ia nuu uma...⁵auā na faalogo Aperaamo i a’u upu, ma na tausi i a’u sauniga, ma a’u poloaiga, ma a’u faatonuga, ma a’u tulafono.” Kene.26.

Ona poloa’i mai lea o le Atua i se mana’oga e sili ona faigata: “²Ia e ave lou atalii, o lou atalii e toatasi, o le ua pele ia te oe, o Isaako lava, ma e alu i le nuu o Moria; ma avatu ia te ia e fai ma taulaga mu i lea mea i le tasi mauga ou te ta’uina atu ai ia te oe.” Kene.22. Ma o le usita’i o Aperaamo i le Upu a le Atua, “³na ala tulai lea o Aperaamo i le taeao lava...ua ave foi Isaako lona atalii.” O manuia folafolaina a le Atua mo Aperaamo, sa faalagolago i le naunauta’i o Aperaamo e tuu atu le mea sa sili ona pele ia te ia. O le taofiofi mau o lona atalii o Isaako o le mea aupito sa’o lea ma tatau, e malamalama lelei o le natura o soo se tamā alofa moni i lana fanau, peitai o le a avea lea ma ala e faamuta ma faalēaogāina ai manuia ua poloa’i mai ai le Atua.

O le ā se mea o loo e taofi mamau i ai, o loo taofiofia faamanuiaga a le Atua mo lou olaga? Atonu po o lau fanau, o au faiga uo ma paaga, o le manumanu i le ta’uleleia o lou igoa, o le paoa, o le tamaoaiga ma oloa, o lou sone filemu, o au amioga ma masaniga? O le naunau o Aperaamo e ofo atu Isaako e fai ma taulaga, o le faatinoga aupito maoa’e lea o le faatuatua. “¹⁷O le faatuatua na fai taulaga ai Aperaamo ia Isaako, ina o tofotofoina o ia” Sa faapefea ona ia mafai ona faia? “¹⁹Ua manatu o ia

e mafai a e le Atua ona toe faatu mai tagata nai e ua otī, o lea foi na ia toe maua mai ai o ia, ua fai lea ma faatusa.” Eperu 11. Na talitonu Aperaamo, o faiga a le Atua, o le tuuina atu ia te Ia o le mea e pele ia te oe, e lē o lona uiga o le a leiloa pe misia ai, a e o le a toe maua mai ai o isi mea e sili atu ona tele ma sili ona lelei. Ma e faapena foi ona Ia faia mo oe!

O LOO TATALO IESU MO OE

^{“³¹}Simona e, Simona e, faauta, ua mana’o tele Satani ia te outou, ia lūlū ia te outou pei o le saito; ³²a ua ou faatoga (tatalo) mo oe, ina nei mavae lou faatuatua; a o oe foi, pe a liua mai oe, ona e faamalosi ai lea i ou uso.”

O e aafia i ni faafitali e te le’i mafaufauina e te ono oo i ai? Sa le’i i ai sou manatu e fai sau faanunumi faalilolilo i tua o lou to’alua faaipoipo. Sa le’i i ai sou manatu e te gaoi, pepelo ma uia auala pi’opi’o ina ia faaeaina ai lou tulaga. Sa mamao lava ou lagona mai le loto vale i manuia o isi tagata. A e a le lafoa’i o lou aiga ma le faia o sauaga matagā i ou tausoga e pele ia te oe, ma le mamao sa i ai lou mafaufau e te ūtia ma pologa i fuālaau faasāina, ma ata matagā i luga o upega tafailagi. Ia e silafia, e lē na o oe e maua ai i lea tulaga! Sa faapea foi i le au sooo o Iesu, sa sili ona latalata i le Alii. Na tautō Peteru na te lē faafitia lona Alii o Iesu, a e mulimuli ane sa ia faia le mea matautia. Sa le’i faia faatasi foi, a e na faalua, ma fai fai sooo, seia oo ina vivini moa. Pe sa alofa Peteru i le Alii? Ioe, e lē fesiligia lena mea. A e peitai o le tagata e vaivai, na ia liliu ai lona tua i lona Matai. O se avega tele ma le mamafa lenei na ia tauave. E leitioa fai mai le tala, “⁶²Ona alu ai lea o ia i fafo, ua tagi lotulotu ia.” Peitai na silafia mamao lava e Iesu le mea o le a tupu, ma sa Ia ta’u atu foi ia Peteru, o le a la faatoga ma tatalo mo ia.

O se mafaufauga matagofie tele lenei: *Pe afai tatou te agasala, e faatoga ma tatalo Iesu mo i tatou!*

^{“²⁵}O le mea foi lea e mafai ai ia te ia ona faaola pea lava i e faalatalata atu i le Atua ona o ia, auā o loo soifua pea ia e fautua mo i latou.” Epe.7. Matamata ane i le ata lenei i lou mafaufau: O loo e tauivi ma se amioga faatupu agasala, o se faaososoga ua malosi tele, ua i’u ina e pa’ū maulalo ai. O le taimi lava lea e tasi, o loo ofoina atu ai e Iesu Lona toto pa’ia e faamamā ai agasala, i le Atua le Tamā, faatasi ma ana faatoga ia te Ia e fai ma ou sui.

(fa’amae’ a itulau 15)

O Ē UA FAI I LAGI FOLAUGA

**SĀMOA VAAFUSUAGA ALEXANDER
PETER AH POE.**

(10/10/1941-31/5/2022 (80+7+22)

Na soifua mai Sāmoa Vaafusuaga Alexander Peter Ah Poe i le Aso Faraile, 10 Oketopa 1941, a e na faamanavaina e le Atua ana feau i le Aso Lua, 31 Me 2022 i le 6 i le taeao segisegi. Ua 80 tausaga, 7 masina ma 22 aso o lona soifua. Na faaipoipo atu Sāmoa ia Tafaogalupe Mulitalo Iuma o Saanapu i le Aso Toonai, 2 Aperila 1966 i Aukilani i Niu Sila, sa faapaiaina e le faifeau PIPC o Leuatea Siō.

O le Aso Sa 12 Juni 2022 i le itula e tasi i le aoauli na aumaia ai lona tino maliu, ma faia ai lona sauniga Faaleaiga i le malumalau o le Nofoa o le Alofa Tunoa i Leulumoega. O le susuga i le faafegaiga o Iuma Patrick Ah Poe FS, o le taulaga soifua a le tamā, o ia lava na taitaia le sauniga.

O le Aso Gafua i le itula e 10 i le taeao na faia ai lona toe sauniga. Sa auai le Pulega a Alofi nei. O le susuga i le Toeaina KMTA ia Ailepata Leuta sa taitaia le sauniga, o Mose Galuvao FS sa faitauina le Tusi Paia, o Tupou Tanielu FS sa nafa ma tatalo, a o Eric Mulitalo FS sa feagai ma le Upu faamafanafana, o a'u sa faaulufaleina mai lona sā ma faia le molimau faaleagaga.

Upu sa fa'aautū i ai la'u molimau: Numera 14:24, '*A o la'u auauna o Kalepo, ona ua ia te ia le loto e ese i o latou, ua na matua mulimuli mai lava ia te a'u, o le mea lea ou te faaoo ai ia te ia i le nuu na ia alu atu i ai, e fai foi lea mo lana fanau.*'

O le suafa lea: '**O la'u auauna**' o le suafa sili ona taualoa i fofoga o le Atua; e lē o tagata uma e toina i ai; e lē fealuai fealuai solo, tei ua faapea le Atua, a o la'u auauna o Pai ma Lafai—Leai! Sei vaganā lava, ua inu malie le Tapaaau i le lagi, i le fa'aaogāina tatau o le meaalofa o le ola, na la topule ai, le ola ua atagia ai le mamalu silisilise o le Alii—le ola ua fa'aalia ai Lona filemu—le soifua ua fai ma viiga o Lona suafa paia.

E lē toatele ni tagata na faasuafa ma toina i ai e le Atua le suafa lenei. I le faasologa o auga suafa: Muamua Iopu, Lua Aperaamo, Tolu Iakopo, Fa Mose, ae lima ia Kalepo.

O le igoa Kalepo, e sau mai le a'a o le upu Eperu, e 2 ona uiga tetele o aumai ai. **O le uiga muamua:** E faatatau i le taifau(sei tulou) e matua loyal ma mulimuli ma le faamaoni, e piimau lona loto i lona matai.

O le uiga lona lua: E faatatau i le fatu e tulagaese lona tele—o le fatu e matuā mapo ma maopopo lelei—o le fatu e lē vaeluaina pe fa'a'afa'afa.

O Sāmoa o le auauna faamaoni a le Atua—E matua loyal lava, e mulimuli ma pipii-mau lona loto i lona Atua.

Na faaipoipo ma Tafaoga i le aso 2 o Aperila i le 1966, lea ua tatala e le Atua le mafutaga i le oti—E matuā loyal ma alofa moni, i si ana manamea, na ia **'I do'** ai. E loyal ma alofa faamaoni i lana fanau, e oo i fanau a lana fanau, faapea lona aiga; e loyal i le nuu, a e sili foi ona loyal i le galuega a le Atua, tainane i ma'ua ma le fanau, o le mea uliuli i ona fofoga.

Na faaeetia i le tofi Tiakono i le tausaga 1967 (55 tausaga).

Faasuafaina i le suafa Sāmoa 1968 (54)—Vaafusuaga 1986 (46).

Faiaoga Aso Sa 1957-1992 (35).

Teutupe Aulotu 1957 e oo mai le taimi nei. (65).

Aoao Fesoasoani 1999 (23).

Komiti o Feau Eseese a le Eklesia Aoao. 2005-2008 (3).

Aoga Tusi Paia a Malua (vasega faavaea)—(Faauu Cer + Dip 2010).

O le fatu e sili ona tele, e mapo ma maopopo lelei, auā ua ia te ia le isi loto e ese i o latou—Tagata faimea-lelei, e naunau i le measili ma le mea e gata mai ai lona mafai—(molimau) galuega tetele uma nei; Falesa, maota-to'a o le faifeau, maota o le galuega, o le Teutupe sa tau faasoasoaina ma faafoe ia 'hua nei to'a.

Laulau Faamanatuga: O le meaalofa lea a Samoa ma Tafaoga ma le fanau, mo le malumalau. Masalo o le laulau o le Talisuaga a le Alii pito i telē lea i le lalolagi atoa. O lea e fai i le ifilele mafafia, ae vaneina ma mamanuina lelei e lona alo ua i'u mai ma faailoga taualoa o le Fine Arts mai NZ. E lē mafai e ni tagata malolosi se toa 10 ona si'ia, sei vaganā ua talai i vaega taitasi ona mafai lea. O le ata o le fai mea sili ma le fai mea lelei ositaulaga i le Atua. Ua lava lea molimau, auā e lē tau molimauina, o loo silafia lelei e le Alii le ola aogā o lana auauna. Tau ia o lenei—Ia fai pea ma viiga sili o le Atua, le ola na ia aumaia, lea ua toe mapu atu i ona aao.

Faafetai i faamanuiaga, tainane au tuu-mavaega, na toina mo i ma'ua ma le fanau, o le a tauave i le fatu, ma teu-mau i le loto, auā aso o totoe o lenei ola. Tautai a'e! Ua malo le toa—Ua faamalo le tau. Fai mai saafiafiga a le fatu solo:

YOUR LIFE IS A BLESSING: YOUR MEMORY
A TREASURE

YOU ARE LOVED BEYOND WORDS: AND
MISSED BEYOND MEASURE.

A o upu o le loto faavauvau o le tupu o Tavita na ia faapea ai:

'TOU TE LĒ ILOA EA, UA MALIU LE ALII
TELE LAVA I LE ASO NEI.'

O la le pese: E! le lagi e, lo'u Tamā o i ai. A valaauna, alu loa.

Alu ia—Alu i le nuu paia—E nofo faatasi ai.

Tofa Sāmoa!!! O le faatofa a le Kerisiano, e lē o le i'uga lea, e lē o le muta'aga foi—A o sa'afiafiga ia o le mautinoa, ta te toe feiloai ma oe, i se aso o i luma.

*Saunia: Susuga Tunupopo Patu FS
EFKS Leulumoega, AANA.*

NA O AFIOGA E TULEI...

(mai le itulau 13)

O LOO TATALO IESU MO OE

E pei o le isi foi ata faatusa o le Faamsinoga, o loo nofo le Faamsino Sili a o faasolo atu i latou ua molia i agasala eseese. E tula'i atu Satani ma ana loia e to laulau agasala ma amio leaga na fai e tagata ta'ito'atasi, ma na faapea atu ai i le Faamsino Sili, "Lau afioga, o moliaga na e faamaonia ai, o ia nei ua tula'i i ou luma, ua tatau ma onomea ona lafo i le lepa afi, o le totogi o ana soliga tulafono. O ia o se tasi o le vaega lenei." Peita'i e tula'i atu Iesu, fa'aali manu'a o ona 'a'ao ma lona itu ma fai atu, "Tama, e moni moliaga o le uso nei, a e silasila mai i o'u manu'a, o le faamaoniga lea ua uma ona ou totogi lana sala i lo'u toto."

Pe mata e talia tatalo a Iesu o loo faia mo oe? O le upu moni lava lenei, ioe, e talia e le Tamā le faatoga a Lona Alo, o tatalo e faia ona a tatou agasala. Ma e pei ona sa faia mo Peteru, o le a lava le umi e faia ai, e faapea foi ona Ia faia, e galue o Ia faatasi ma i tatou se'ia oo ina tatou toe liua mai, ma faamalosi, ma toe faafoisia.

PEI O FATU OLA I TOTONU

"¹³O le upu a le Atua ua matuā galue i totonu..."

Pe afai e te faitau Afioga paia a le Atua ma talitonu i ai ma faatino, e faatusaina lea i fatu laau o loo ola i totonu ia te oe. O fatu na e i ai le ola! I le natura o le lalolagi, e te lē tau saili ina ia malamalamā le auala pe faapefēa ona ola fatu laau; na o le pau le mea e te fai i ai o le faasūsū, fafailele, ma puipui, ona tupu lava lea ma ola o ia. Ma e faapena foi Afioga paia a le Atua.

O le Tusi a Paulo ia 2 Tesalonia 2, "¹³O le mea lea matou te faafetai ai i le Atua e le aunoa, auā na talia e outou le afioga a le Atua na outou faalogo mai ai ia i matou, ua lē talia e outou o le upu a tagata, a e peitai o le upu a le Atua (e moni lava lea), ua matuā galue foi lea i totonu ia te outou o e faatuatua." O le fuitau 'ua matuā galue i totonu ia te outou', o loo faasino i le Upu a le Atua e tausia, ma lagolagoina o ia e ia lava (self-sustaining); na te lē manaomia nisi tagata poo nisi auala e faagaiōi ai ina ia tino mai.

I le tala mai le Feagaiga Fou ina ua savali atu Iesu i luga o le vai aga'i i lona au soo, na fai atu Peteru, "²⁸Le Alii e, afai o oe, ia e fetalai mai ia te au, ou te alu atu ia te oe i luga o le vai." Mata. 14. E tasi le upu a Iesu na tali atu ai, "Sau" (Ina sau ia) ma amata loa ona savali Peteru. O isi o le au soo atonu sa le'i talitonu e mafaia e Peteru ona savali i luga o le vai. Ma e mafua mai ona sa latou le'i malamalamā **po o ai** lea sa fai atu ia Peteru. "⁴⁹A o i latou ua iloa o Ia o savali i luga o le vai, fa i latou se atiu;" Mare. 6.

O i ai se lesona tāua mo i tatou mai lenei tala. Pe afai e fetalai mai le Atua ia i tatou e ala i Lana Upu, ia 'aua tatou te manatu e malamalamā ma talitonu i ai tagata uma, e talia, lagolago i la tatou mau. O le uiga masani o le tagata le mana'o i se vaega faapitoa o tagata latou te vaaia mea ua e iloa, ma talitonu i mea e te fai. Peitai i le vaega lenei o le Tusi Paia, ua saunia ai i tatou e le Atua mo le te'ena e i latou e lē malamalamā, i mea ua ta'u mai e le Atua ia i tatou.


Pe afai tatou te lē mataala ma faaeteete, e avea manatu o tagata tatou te faaluafesasi ma masalomia ai folafolaga a le Atua ua fai mai ia i tatou. O nisi taimi e faamaonia e le Atua Lana Upu ia i tatou, e ala mai nisi tagata; a o nisi foi taimi, e lē faapeaina. Peitai, pe afai tatou te taumamafa pea i Lana Upu ma talitonu i ai, ona tatou matuā ma'o'ona lava lea, auā o le Upu a le Atua, ua matuā galue i totonu.



MALUMALU TUAI (luga) & MALUMALU FOU (lalo) EFKS SALEAULA



**SAMOA VAAFUSUAGA ALEXANDER
PETER AH POE**



O LE LOTU MA LE KOVITI



***Susuga BJ Faau FS, Ofisa Faamisionare,
ma Sui auai i le Ulua'i Aso Sa i Lalomanu***